

Baselgias tradiziunalas perdan lur relevanza

Religiun e spiritualità en Svizra en il turnigl dal temp

MARTIN CABALZAR/FMR

■ Radund 70 pertschient da la populaziun svizra inditgescha d'appartegnair ad ina religiun. Ina quarta da la populaziun sa participescha dapli che tschintg giadas ad onn ad in cult divin, ina maiortad fa almain ina giada ad onn uraziun. Radund 8 pertschient da la populaziun èn – tenor atgnas indicaziuns – gia vegnids discriminads pervi da lur persvasiun religiusa. En cumparegliazion cun 2014 è l'impurtanza da la religiun e da la spiritualità sa reducida marcantamain tar l'educaziun dals uffants. Quai èn intgins resultats che resortan da la segunda retschertga davart lingua, religiun e cultura, realisada da l'Uffizi federal da statistica.

Las midadas da la cuntrada religiusa èn s'acceleradas marcantamain en il decurs dals ultims onns. Anc avant 50 onns era prest l'entira populaziun u protestanta (49%) u catolica (47%). La cumpart da questas duas confessiuns è sa reducida actualmain sin 23% resp. 35%, entant che la cumpart da la populaziun senza appartegnientscha confessiunala è creschida da 1% sin 28%. La cumpart da las ulteriuras cuminanzas cristianas u evangelicalas sco er da las ulteriuras religiuns munta oz a 7.0%, la cumpart da las cuminanzas musulmas a 5.3%.

La pratica religiusa tschessa

L'onn 2019 ha bun ina quarta (28%) da la populaziun frequentà pli che tschintg giadas in servetsch divin. Per radund 40% è quai stà ina fin tschintg giadas. Ils ultims numnads han fatg quai per 87% or da motivs socials, sco per exempel la participaziun a nozzas e funerals.

Bun la mesadad da la populaziun (55%) fa uraziun almain ina giada ad onn. Entaifer las raspadas protestantas è la cumpart da personas che n'han mai



En il decurs dals ultims onns han las baselgias uffizialas pers adina dapli da lur relevanza publica.

FOTO MAD

fatg uraziun en il decurs da l'onn cun 38% pli auta che tar cuminanzas musulmas cun 31% ed en las cuminanzas catolicas cun 30%. En las cuminanzas evangelicalas uran 30% da las commemoras e dals commembers pliras giadas a di e 54% mintga di ni prest mintga di. Radund mintga tschintgavla persuna (19%) che ha inditgà da na betg appartegnair ad ina religiun, fa almain ina giada ad onn uraziun.

Cardientscha en in sulet Dieu

La cumpart da personas che han inditgà da crair en in sulet Dieu, è sa midada considerablmain dapi l'ultima retschertga da 2014. La monodeità è anc adina la furma da cretta la pli derasada, sia cumpart è dentant sa sminuida ils ultims 5 onns da 46% sin 40%. Ina terza da la populaziun na crai ni en in sulet ni en plirs Dieus, mabain plitost en ina pussanza pli auta. Questa cumpart è restada constanta dapi 2014. La cumpart da personas ateistas è creschida da 12 sin 15%, quella dals agnostichers,

quai vul dir personas che n'èn betg segiras sch'i dat in u plirs Dieus è creschida en il medem interval da 17 sin 18 pertschient.

Prest ina quarta da la populaziun (24%) ha pratigà en il decurs da l'ultim onn avant che la retschertga è vegnida fatga tecnicis da moviment e da respiraziun sco yoga, tai-chi, quigong. L'onn 2014 era quai anc stà 19%. L'onn 2019 èn 23% da la populaziun s'occupads dal svilup da la personalità, 2014 era quai anc 21%.

Educaziun religiusa dals uffants

L'onn 2019 appartegnevan prest ina terza dals uffants sut 15 onns a nagina religiun, 2014 era quai anc stà ina quarta. Per 42% da la populaziun gioga la religiun u la spiritualità anc ina rolla «impurtanta u plitost impurtanta» tar l'educaziun dals uffants, 2014 era quai anc stà 47%. Passa in tschintgavel dals geniturs (22%) considereschan per impurtant che lur uffants sut 18 onns vegnian educads tenor ils principis da lur re-

ligiun. 15 pertschient vulan intermediar valurs spiritualas e 44% prefereschan autras valurs, talas che n'èn ni religiusas ni spiritualas.

Discriminaziun religiusa

Radund 8.2 pertschient da la populaziun han inditgà 2019 ch'els sajan gia daventads unfrendas da discriminaziun pervi da lur orientaziun religiusa. Pertutgads particularmain da talas discriminaziuns èn cunzunt ils muslims: 35% èn stads confruntads almain ina giada en ina situaziun concreta da discriminaziun pervi da lur religiun. Alura suondan personas da las ulteriuras religiuns (26%) e d'autras cuminanzas evangelicalas (17%).

Discriminaziuns pon sa manifestar en differentas spartas da la vita, sco per exempel a la lavur, en scola, en l'empredissadi u studi sco era tar la tschertga d'abitaziuns. Da las personas che han tenor lur atgnas indicaziuns resentì discriminaziuns è quai succedì per 50% en il rom da discurs.